



**Mehmet Bislimi**

**Libra të botura  
deri më tani:**

*„Anekdotë popullore  
dhe satira autoriale”,  
Prishtinë 2002.*

*„Trëndafila maji” poezi,  
Prishtinë, 2002.*

*„Fjalë dhe gurë” poezi,  
Prishtinë 2003.*

*„Këtu i thonë Drenicë”  
Tahir Meha - monografi,  
Prishtinë 2004.*

*„Ironi e verdhë poezi,  
Prishtinë 2005.*

*„Stinë e vonuar” poezi,  
Prishtinë 2008.*

*„Shkrime publicistike”,  
Prishtinë 2009.*

*„Anekdotë popullore  
dhe satira autoriale II”  
Prishtinë 2010.*

*„Mehmet Della alias  
Mehmeti i Vogël”  
Prishtinë 2011.*

Mehmet Bislimi - SHPIRTNDRITURI



**Mehmet Bislimi**

**SHPIRTNDRITURI**

**Poezi**

*Mehmet Bislmi*  
SHPIRTNDRITURI

**Mehmet Bislimi**  
**SHPIRTNDRITURI**

Redaktor:  
**Zenun GJOCAJ**

Lektor:  
**Emin HALIMI**

Recensent:  
**Adnan ASLLANI**

Ballina dhe faqosja  
**Sabir KRASNIQI**

Botues:  
**PPG “Shkrola”**  
Prishtinë

Copyright & 2012  
Autori

**Mehmet Bislimi**

# **SHPIRTNDRITURI**

**P O E Z I**



... Ata ranë ditën me diell, me besimin tek Zoti dhe Liria, nga jeta e rëndë nuk u ankuan kurrë.

Ata e çmonin jetën më shumë nga ne, mbi të gjitha e çmonin lirinë, së cilës ia falën edhe jetën. Ata ikën, mbase me të vetmen brengë se nuk do të jenë gjallë, kur atdheu do të jetë më i mirë, më i bukur, më i çliruar dhe përfundimisht i bashkuar. Kjo ishte aspirata e tyre që nuk u përmbush. Deri në përmbarimin e saj, ata prehen të qetë, por prehja nuk i qetëson!...

... kënga ime, këngë e vjetër  
veç teje, këtë natë nuk gjeta  
jo  
nuk gjeta  
prehje tjetër

**- autori**



## **FJALA E REDAKTORIT**

### **DREJT SHTEGTIMEVE TË REJA E MË TË THELLA POETIKE**

Nga shkaku i veprimtarisë atdhetare, përndjekjes dhe vuajtjes së dënimit nga pushtuesi sllav, sa i përket veprimtarisë letrare, M. Bislimi, megjithatë, e arriti hapin e kohës. Në mënyrë intensive me veprimtari artistike ai u mor që në vitet tetëdhjeta, sidomos kur u deshtë të mërgohet në Zvicër, nga shkaku i përndjekjeve të pushtuesit, ku jeton edhe sot e kësaj dite. Shkrimet e para të tij botohen së pari në “Bota e re” më 1986. Ndërkaq, me botime veprash, filloi që në fillim të këtij shekulli, pikërisht më 2002, ku pothuaj për çdo vit botoi nga një vepër të zhanrit të ndryshëm, sidomos poezisë.

Veprat e tij poetike shprehin veçoritë e botës së modeluar poetike, përdëgjimet metonimike të shprehjes evokative, një imazh magjeps të hapësirës lirike. Te fundi, edhe shkrimtari Borges e dokumentoi se vetë imagjinata e poetit është poetike.

Në poezitë e tij, në përgjithësi, M. Bislimi shquhet për intuitë të veçantë krijuese, intonim të theksuar lirik, të thurura përmes një shprehjeje të



kursyer lakonike. Andaj, konteksti i tij lirik e lakonik zgjon asociacione të ndryshme kuptimore-metaforike, gjithnjë më të thelluar në krahasim me përmbledhjet e më parme, ku fshehtësia e magjisë dhe domethënia e verbit nuk mund të rrokët gjithaq lehtë.

Poenta kryesore e mesazhit poetik të autorit, apo parimi bazë krijues i tij, është lidhja e fortë emocionuese me atdheun, kohën dhe realitetin. Në këtë kontekst, shpirti i poetit përmban poezinë e jetës tjetër, që përthyeret nëpër artin poetik. Përmes kësaj, autori shpalos metaforën e mendësisë më tej se etnike.

Si pjesëmarrës aktiv i lëvizjes çlirimtare, që e vuajti më lëkurë, në poezi autori e shpreh dramën kombëtare nëpër shtërgata shekujsh, ku shfletohet historia e këtij trualli etnik dhe stuhia e saj simbolike. Kështu në ciklin “Madhështia e yjeve” ai poetikisht i skalit ca figura dhe çerdhe të rëndësishme historike kombëtare që kryen funksionin triumfues ose gjenden ende në shkallëzimin e mëtejshëm të pedestalit historiko-etnik, siç ishte hero i legjendar A. Jashari, Remzi Ademaj, Luan Haradinaj, pastaj, Kruja, Vlora, “Çamëria”, Prishtina (“Hyrje në Pranverë”) etj., ku pos tjerash, M. Bislimi e poetizon legjendarin Adem Jashari, “me syrin pishë e zemrën prush”, ky hero:

”...më i bukuri yll gjithësie

kërthizë e atdheut lidhur nyje  
mbaje fort në gji birin tënd  
si lum për ty Shqipëria nënë!”

pastaj: Remzi Ademin / Petrit Kodrën, që  
“tokës sonë arbërore / përjetësisht / po i bëjnë  
dritë”, mandej “pas kushtrimit / gjithë një zëri/  
Luan ishte vetëm njëri”, është kjo gjetje e  
papërsëritshme e autorit për Luan Haradinajn, si  
dhe qindra dëshmorë tjerë që nxorën Kosovën nga  
kthetrat e bishës serbe.

Vetë brumi i poetizuar në këtë përmbledhje,  
nxjerr në shesh metaforën epike të një lloji të  
veçantë, si risi në poezinë tone, siç është poezia  
“Ndër shekuj”, ku “pushtuesi e ka ngrënë kokën e  
vet”, pastaj si në ëndërr, ku vëllai e mban besën e  
dhënë motrës, motiv ky i zgjeruar në poezi  
folklorike, artistike dhe në prozën më  
bashkëkohore, sidomos te I. Kadare, pastaj “Vatër  
krenare”, “Rreze dielli”, “Pika loti”, “Hyrje në  
pranverë” (shpërthimi i demonstrative në Kosovë  
më 1981-9), pa i lënë anash edhe plagët po aq të  
mëdha, siç është “Çamëri”, “Vlora” etj. Të gjitha  
këto me synime të realizimit të aspiratës  
shekullore për një Shqipëri etnike, të përmbyllur  
përmes Krujës skënderbejane, Lidhjes shqiptare  
me seli në Prizren, Vlorës, Prishtinës së 81-shit,  
dhe së fundi Prekazit, të reflektuar përmes  
udhëtimit të flamurit me buzë në gaz. Aty  
shpaloset edhe harta metaforike e dhembjes së

lashtë iliro-dardane, dinjiteti lirik përballë dramës së etnisë, duke krijuar situata të përthyerë përmes fitores së jetës ndaj vdekjes metaforike, deri te rrezet e diellit që s'ë lënë poetin të vdesë, pa i parë ato. Andaj, sipas poetit, ende nuk kanë dalë rrezet e vërteta të lirisë, përderisa: "...gjaku im / Preshevë / Medvegjë / Bujanoc / Çamëri / Ulqin, janë krenari e gjallë, që presin ditë më të mira në hapësirën etnike; atje ku:

këngës ia thotë shqiptari ...  
ku ka jetuar i pari  
i rrënjës sonë të patretur  
i rrënjës sonë të vjetër  
nga Ulqini në Janinë  
nga Medvegja në Prishtinë

### **(Vatër krenare)**

Janë këto disa nga tufat subjektive të strukturës poetike të veprës së M. Bislimit, ku sitet drama tronditëse e përsëritur ndër shekuj, e fiksuar në hapësirën e fatit. Pos tjerash, bie në sy se autori sikur e njeh mirë pafundësinë e ëndrrës etnike, përgjithësisht njerëzore. Si i tillë, ai i shfrytëzon me mjeshtri nuancat më të rralla të fjalës e shprehjes poetike, të shkrira në një simbiozë metaforike.

Në vazhdim bie në sy një shkallëzim më cilësor i nervit poetik të autorit në shkallë

refleksive, një peshë më e matur shprehësie poetike. Në ciklin: “Urtarë mjekërbardhë” autori, pos tjerash, e modernizon shprehësinë e ideve poetike të “Shqypnisë së robnueme” të Vaso Pashës, e shkruar gati një shekull e gjysmë më parë, duke u bazuar se na ka bërë një nënë. Nuk është motiv i përsëritur apo i vjetruar. Vetë mosrealizimi i dëshirave të kërkuara kombëtare për një Shqipëri etnike që atëherë, fatkeqësisht, edhe sot e kësaj dite, është e pakryer. Andaj, pothuaj, të gjitha poezitë e këtij cikli i shërbejnë bashkimit shpirtëror e kombëtar në kornizat e së drejtës dhe të vërtetës njerëzore, se “s’ka gjë më mirë / kur s’kemi përse të frikohemi nga e vërteta e guximi / për t’i thënë gjërat me emrin dhe mbiemrin e vet. (E gjeta). Sipas poetit, kjo është “Bujari njerëzore”, madje edhe kur ata gjithçka dhanë për të tjerët dhe ndërruan jetën me lirinë, për ta gëzuar të tjerët (Botë e përtejme)

Aty haset malli i kursyer për atdhe, sepse, sikur autori duket se është shfryrë në përmbledhjet e më parme, por edhe pse i duket se nostalgjisë tashmë i ka kaluar koha, tani në kushtet e komunikimit bashkëkohor. Megjithatë, paksa prekëse, metaforike është edhe poezia “Të urtës nënë”, që mbetet në pritje për t’iu kthyer bijve të vet. Është një mall i metaforizuar i dhembjes së gjatë shekullore përcjellë me gjak e lot.

Autori di ta gdhend vargun e metaforën me një mjeshtri të rrallë poetike. Ai tashmë e ka

kapërcyer prapun e sprovave dhe e ka formuar individualitetin e vet poetik, me shtyllat: Zanoret e bardha, Malli i përflakur, Lirikat e fjetura, Tingulli i gërvishtur dhe së fundi Kumbim kambanash, të përcjella me kontekstin e frymëzimeve poetike.

Poezia e M. Bislimit vjen nga zjarri i zemrës, gërshetuar me realitetin jetësor dhe e shkrië me metaforën e këndshme të stolisur me fshehtësitë e shpirtit të shprehur përmes tablosh poetike të kohës, jetës dhe të poezisë. Kështu:

burrat e motit  
fjalën e dhënë për liri  
nuk e mohuan,  
me gjithë sakrificat.

### (Sprovë)

Madje, as sot e kësaj dite, ata burra unin e vet nuk e qesin në lojë (Nuk erdha). Jepet një laryshi e begatshme temash poetike e pikturimesh shpirtërore të skalitura me mjete të pasura stilistike-poetike. Poezia e tij bulon atje ku syri i mprehtë i frymëzimeve shpirtërore vlon jo vetëm përmes reflekseve patriotike, por për të gjitha rrezet jetësore që e freskojnë lirinë njerëzore, madje edhe e shërojnë nga mungesat jetësore-kombëtare. Kështu, poeti thur lirika të së sotmes, qofshin ato të këndshme a të hidhura për kohë dhe

njerëz, gjithnjë duke kërkuar zgjidhjet fatlume, përkundër poezisë së Rilindjes, ku kryesisht kishin melodi vajtuese, duke mos kërkuar gjithaq shtigje për të dalë nga ajo amulli, me ca përjashtime te Naimi, Çajupi etj.

Vargjet poetika të M. Bislimit kanë një figuracion të pasur poetik e stilistik, mjaft të kursyer, të cilët me të shprushur, qesin flakë. Janë poezi të motivuara e të frymëzuara, që burojnë nga thellësitë e shpirtit dhe shkrihen në frymëmarrjen e kohës, madje dhe më tej se në truallin arbëror.

Shpirti poetik e atdhetar i poetit është i shkrirë në universin njerëzor të qenies kombëtare që synon tani një formësim të ri artistik e kombëtar, përgjithësisht njerëzor, kur kombi ende gjendet në një kryqëzim të një rendi të ri shoqëror ende të pakompletuar, ndërsa i kërkohet të mos e kthejë kokën prapa, me gjithë copat e lëna jashtë truallit, për të hyrë e për t'u shkrirë në vallen e madhe të një bashkësie me mungesa gjymtyrësie tokësore, kombëtare, shpirtërore etj. Për këtë, poeti porosit:

kohë dhe njerëz  
ngritni zërin  
mos heshtni kur gjëma mbi tjetrin bie  
kur ngriheni në mëngjes  
thoni me sa zë keni  
o qafën e thehtë  
kurrë mos paftë ditën e vet

bukë e besë shkelësi

### (Zërin e ngrita)

Ndërkaq, kjo pritje e gjatë shekullore, “... atë ditë / kur tek kjo derë / do bëhet i zoti / ...do thahet loti (Pritje). Realiteti i sotëm na tregon se ende jemi me sy të përlotur, por poezia po tregon rrugën e daljes nga kjo përlotje.

Pos tjerash, vetë malli i përflakur edhe si cikël më vete, sipas poetit, është rrjedhë e një gjendje jetësore kombëtare në rrugëtim të dhimbshëm, që kërkon një kahe të përsququr edhe për të tjera dhembje. Prej këndej poeti na tregon “Portën e përgjakur”: “...po kthehemi të përgjakur me lëmshin e mbledhur në grykë / po rikthehem / unë birit yt i tretur / flokë bardhë / e plak me mjekër / po kthehem tek pragu yt / me lëmshin e mbledhur në grykë...” (Porta ime e lashtë)

Në ciklin e fundit “Kumbim kambanash” poeti tubon poezi të zhanrit të ndryshëm, në mes tjerash:

“Stublla e gurtë  
Stublla e murtë  
në tokë kur Krishti zbriti s'pari  
ku  
e priti shqiptari.

i ndanin tokat e shqiptarisë

reliev gunga-gunga  
të tkurri kaq shumë koha  
të tkurri dhuna  
toka që vazhdon të thërrasë  
ku jeni o burra

### (Tkurrje)

Cikli “Lirikat e fjetura”, përbëhet nga poezi kryesisht me motive intime, ku poeti (mos i ngjafte me jetë) sa janë të perënduara si lirikat e tilla të Migjenit (nga koha e kaluar e asaj shkalle rinore), po aq e njomin veprën me ndjenja intime të një stili të mëvetësishëm poetik. Po ashtu edhe cikli “Tingull i gërvishtur” përbëhet kryesisht prej poezive satirike, me theks kryesor:

për bijtë e lakmisë  
çakërritur me gishtërinjtë e thatë  
tapitë e humbjes së dekadave  
po mbanin në duar

Në këtë vepër poetike, M. Bislimi përdor stil konciz me pasuri fjalësh e shprehjesh të figurshme e të spikatura. Figurat janë të lidhura me tematikën, gërshetuar me asociacione imazhesh. Poeti gjendet në rrugën e pasurimit të tipareve të individualitetit poetik, ecje drejt një shkalle gjithnjë më cilësore, krijuese i semantikës poetike,



begatuar me një figuracion të goditur e vetjak, me ritme e rima të larmishme.

Motivet e tij janë përcaktues të rrugës së tij poetike, gjithnjë në kërkim të individualitetit të tij, në bazë të burimit të pashtershëm frymëzues, në qasje me rrjedhat e kohës, brumosur me material jetësor, kombëtar, shpirtëror e refleksiv, që synon një sintezë të shkrirë me elementet estetike e metaforike, sidomos tani pas një gjumi të rëndë e të gjatë robërie, kur duhet luftuar për mëkëmbje, dhe për pavarësinë e pjesëve të mbetura etnike nën zgjedhë të huaj...

Te autori vërehen edhe prurje elementesh të reja poetike, në krahasim me krijimtarinë e tillë të mëparshme, gjë që flet për ambicie serioze, këmbëngulëse dhe avancuese të shkallëzuar me një talent në zhvillim e sipër. Ka edhe figura befasuese. Përdor një figuracion të thellë e të larmishëm metaforik, në harmoni me stilin konciz. Temperamenti impulsiv i poetit M. Bislimit është i gjallërishëm, ku detaji luan rolin kryesor organizues.

*Prof. Dr. Zenun GJOCAJ*

**MADHESHTI E YJEVE**

## Legjendarit

kam pasur fatin  
ta preku  
ta shoh  
ta njoh Komandantin  
këtë burrë Shqiptarie  
me shikimin lart  
me zemër të madhe sa mali  
ngrirë në bronz përjetësie  
zemër trimi  
zemër djali

pjesë e pandarë historie  
atdheut kush më shumë i fali  
dashuri  
mustaqet varë deri në gushë  
si lum për ty moj nënë Shqipëri

ndër yje  
më i bukuri yll gjithësie  
kërthizë e atdheut lidhur nyje  
mbaje fort në gji birin tënd  
si lum për ty Shqipëria nënë

më i bukuri bir i shqiptarisë  
lis  
më i larti ndër male  
mustaqet varë deri në gushë

me syrin pishë  
e gjoksin prush

**Remzi Ademit**  
*(Komandant Petrit Kodrës)*

në pafundësinë e hapësirave shqiptare  
shkëndija po i nxirrnin sytë  
toka po digjej zjarr  
ti në të parin fluturim  
së bashku me shqipet e këtyre anëve  
përqafove lartësitë  
përjetësisht  
flakadan lirie  
tokës shqiptare po i bën dritë

mbi ty  
mbi emrin tënd  
mbi rrënjën tënde të lashtë  
kurrë drita e krenaria mos u shoftë  
përjetësisht rrënja e nderi t'u shtoftë  
deri atje në majat e Pashtrikut  
atje  
ku është foleja e shqipeve  
dhe streha e mikut  
emri yt  
Petrit  
tokës sonë arbërore  
përjetësisht  
po i bën dritë

## **Luanit**

me Shkëlzenin po rrugëtonin  
nga moti në mot  
si qielli i kaltër  
rreze dielli shpërndarë  
për botën liridashëse  
mbi Shkëlzen e mbi Sharr

lulëkuqe të këputura  
Shkëlzeni, Hakifi, Edi, Zahiri, Muji, Adriani...  
pas kushtrimit gjithë një zëri  
Luan ishte  
vetëm njëri

## **Vatër krenare**

krenari e gjallë  
gjaku im  
Preshevë  
Medvegjë  
Bujanoc  
Çamëri  
Ulqin

atje ku këngës ia thotë shqiptari  
atje ku kam jetuar unë  
ku ka jetuar i pari  
i rrënjës sonë të patretur  
i rrënjës sonë të vjetër  
nga Ulqini në Janinë  
nga Medvegja në Prishtinë  
veç shqiptarit nuk ka tjetër  
në këto troje  
më të vjetër

## Gënjeva

ah

më duhet të të gënjej

se i lumtur jam

se me lumturinë ngrysem dhe agoj

më duhet të të gënjej se pa ty atdhe

jeta gjallëron njësoj

më duhet të të gënjej

dhe për këtë

peshë e pendimit mbi supe

gjatë do më rëndojë

në fakt

të vërtetën ndryva

në gjoksin tim përgjithmonë

e nuk ta thashë dot

të vërtetën e madhe e di

vetëm shpirti im

dhe i madhi zot



## **Gjithmonë**

gjithmonë do të kthehem tek ti  
edhe pas vdekjes  
toka brenda nuk do më lërë të qetë  
nuk e di nëse unë ju mungoj  
aq sa më mungoni ju mua  
nuk e di nëse më doni  
aq sa unë ju dua  
nuk e di

peizazhe të atdheut  
më çoni shpirtin peshë  
më trazoni kaq shumë  
unë shpirttrazuar  
si hije  
as zgjuar  
as në gjumë

## **Pika loti**

a thua kështu paska thënë zoti  
të degdisur anembanë  
pika gjaku  
pika loti  
na mbeti pa emër konaku  
me peshën e vuajtjeve mbi shpinë  
na mbeti shkret oxhaku

me zemër në plasje  
Çamëri  
Ulqin  
Janinë  
me lot e trishtim  
dot nuk ju kthjem  
pika loti  
pika gjaku  
na mbiu ferra te pragu

## Çamëri

gjymtyrë e trupit tim  
me plagët e ndarjes mbi shtat  
që nga dëbimi i parë  
dhembje e gjatë  
pengu i shpirtit mbetur varë  
Çamëri  
mos vdeksha i ri  
pa hequr vetë me dorën time  
në arat tona  
brazdën e parë  
në tokën boshatisur  
parmendë e vjetër  
shenjë gjallërie e një kohe tjetër  
zotin e madh e kemi dëshmitar  
Çamëri  
mos vdeksha i ri  
pa ardhur tek ti  
tek porta jonë e vjetër  
tek të parët tanë  
tek foleja jonë  
nën atë çati  
ah  
Çamëri  
pengu ynë i përjetshëm  
plagë që djeg në gji

## Nëntori

nga qielli  
zbritën legjendat  
lindën kuçedrat  
zbardhi dita jonë  
në palë të flamurit erdhi djali  
në nëntor  
u gëzua mali  
për tokë e qiell  
për Shqipëri  
nëntor ka  
vetëm një

## **Ndër shekuj**

hallakatjet e erërave trazuan  
rugën tonë të madhe  
ndër shekuj  
të parët historinë bëmë  
Milush Kopiliqi  
i pari  
me dorën e vet  
vrau ëndrrën e pushtuesve  
sulltanin e mbuloi bari  
tokë e mbushur me kocka  
tokë shqiptari

kokën e vet  
pushtuesit kanë ngrënë  
këtu zot  
vetë  
shqiptarët janë

## **Me gjuhën e vet**

asht i vjetër kërcor  
nga dheu nuk tretë  
dëshmi e kohës  
me gjuhën e ashtit që flet  
në tokat tona të zhuritura  
sakrificat mbinjerëzore flasin  
me gjuhën e vet

nën peshën e dheut  
ku ashti ynë tretë  
kohët e një mbijetese të skajshme  
peshë qëndrese e pakapshme  
gojëhapur arkeologu mbet  
ashti ynë  
nuk ishte kalbur  
as ishte tretë

## **Si në ëndërr**

kush di t'i zbërthejë ëndrrat  
kush fatin mbi to mbështet  
nga ëndrrat ikim  
si në ëndërr kjo jetë  
qofshin ata  
amen  
qofshim vetë

na duhet kohë  
që ta sjellim në kala  
nga fundi i botës Doruntinën  
vëllai ngritur nga varri  
erë dheu po vinte  
po vinte erë bari  
prej kohësh  
vëlla e motër  
të djegur malli

në kërkim të pafajësisë  
u ngritëm edhe nga fundi i dheut  
besën e dhënë  
peng nuk e lamë  
motrat i sollëm në gjirin e këngës së lashtë  
si në ëndërr  
erdhëm edhe nga bota tjetër  
fluturim me atin e bardhë  
përballë motrës

fjalën e dhënë  
peng nuk e lamë



## **Sa mali**

rrallë ka për të rënë të dëgjosh  
kur të tjerët thonë  
ishte i madh ai  
sa mali

që të mos u hyjmë në hak  
të jemi të singertë me ta  
ta vemi dorën në zemër  
e të mos bëjmë mëkat  
para zotit e robit  
djemtë që ranë në zemër të malit  
për ty  
për ne  
për mua  
për atdhe  
madhështia vjen nga përcaktimi  
janë të mëdhenj ata  
të mëdhenj  
sa mali

## **E tillë ishte jeta**

për një moment stepa  
dhembja ashtin ma shpoi  
tani  
ashti im i mplakur  
peshën e dhembjes s'e duroi

netët e gjata pas grilave  
më të ndriturit mes kandilave  
flakadanë lirie  
idealistë të pamposhtur  
këmbëngulës e të pareshtur  
të rreptë si rrëfeja  
përherë  
portën hapur kemi mbajtur  
bukë e kripë  
me zemër në dorë

e tillë ishte jeta  
në arratisje  
në burgje  
në mërgim  
poemë pa metaforë  
poemë pa dekorata e çmim  
bijtë e Shqipërisë  
pjesë e historisë së pashkruar  
bijtë e kësaj toke  
harruar e lënë me një anë

sfiduesit e robërisë  
bijtë e tokës nënë

## Hyrje në pranverë

pranë dritares sy hapur  
nga majë e pemës  
u ngrit zogu në fluturim  
me krahët e butë  
borën e bardhë shkundi  
pranvera po vjen  
më në fund  
edhe në qytetin tim

po  
po vjen marsi i trëndafilave  
afshi i ngrohtë tokën puthiti  
një lirikë  
për bisqet e pemës  
po ndihet frymëmarrja e blerimit  
ngrohtësi e stinës ripërtëritëse  
stinë e lulëkuqeve  
të marsit të parë

Prishtinë kujto me dashuri  
kujto  
stinën e trëndafilave të kuq lirie  
Prishtinë ata ishin të rinj  
si trëndafilat  
që ranë në pranverën '81

## **Vlora**

në rrugëtimin tonë të gjatë  
kot nuk shkuan trimat  
me vrap deri në Vlorë  
një copë flamuri  
për ta sjellë në Kosovë  
epopenë e këngës njëqindvjeçare  
e sollën selamlabët  
e sollën gunëbardhët  
e sollën tek Jasharët  
e vunë mbi kullën prej guri  
nga Vlora në Prekaz  
njëqind vjet rrugëtoi Marigo  
rrugëtoi  
me buzën në gaz

## **Rreze dielli**

bëhem një me terrin  
pres dritën  
dritën e agut të parë  
mbi majat e shkëmbit të vjetër  
ti rrezon ngadalë  
atdhe  
po pres që sa vite  
rrezet e para  
rrezet e lirisë  
ditët e mira të shqiptarisë

ngrohtësinë e lirisë  
afshin e saj po e pres  
ti ec më shpejt pse nuk vjen  
kockat nuk më mbajnë  
nuk dua të vdes  
të vdes  
pa të parë të lirë

## Kënga ime

ata ranë ditën me diell  
me besimin tek zoti dhe liria  
nuk u ankuan kurrë nga jeta e rëndë  
jetën e çmonin më shumë nga ne  
mbi të gjitha e çmonin lirinë  
të cilës ia falën edhe jetën

ata ikën  
mbase me të vetmen brengë  
së nuk do të jenë gjallë  
kur atdheu do të jetë më i mirë  
më i bukur  
i çliruar  
përfundimisht i bashkuar

kjo ishte aspirata e tyre që nuk u përmbush  
deri në përmbarimin e saj  
ata prehen të qetë  
por prehja nuk i qetëson

këngë ime  
këngë e vjetër  
veç teje këtë natë nuk gjeta  
jo  
nuk gjeta  
prehje tjetër

## Numra

të tjerët nuk na kuptuan kurrë  
pa dashjen tonë  
ata në lojë na vunë  
rrethuar me emrat njëjës  
prapë si dikur  
shumica e të përvuajturve  
shpërndarë anembanë  
si numra pak  
si dikur  
të anatemuar prapë

numra që gjithmonë  
ishin më shumë se një  
me shpresën nën dhëmbë  
nuk u dhanë  
nga një kafshore bukë  
e hanin në këmbë  
na përbuzën bukëshkalët  
prapë  
numra në ngritje  
që atdheut kurrë  
nuk i kanë hyrë në hak





**URTARË MJEKËRBARDHË**

## Mesazh

me engjëj e profetë jam  
gjakun e Krishtit e Muhametit kam  
jam me kishë e xhami  
me më të mirët e kësaj bote  
me rrënjën time të lashtë  
jam  
me shqiptari

idhuj të vendit tim  
kulturë gërshetimi në kërthizën e tokës sonë  
nga lindje në perëndim  
sa admiruese si askund në botë  
tokë e ashpër  
paqe shpirtërore të përjetshme  
popullit tim  
gjunjëzohem para bindjeve të motit  
para juve  
para shtëpive të zotit  
njëri tjetrin mos ta ngasim  
së bashku  
botën e vjetër ta vrasim  
të krishterë e myslimanë  
shqiptarë kudo që jeni  
na ka bërë  
një nënë

**Ai**

ishte më i veçantë nga të tjerët  
i tillë ishte ai  
tjetërsimin nuk deshi  
i qetë si oqean  
ai kurrë nuk tha  
ja ku jam

e gjenim kur na duhej  
ku ishte e ku nuk ishte

një ditë  
kur  
askujt nuk iu desh më  
ai prapë i madh mbeti  
mes njerëzve e para zotit  
ishte shumë njerëzor  
nuk përkulej para sfidave të motit  
ishte burrë  
mjekërbardhë  
si bjeshka me borë

## Mure

në kërkim të një ndarjeje të përjetshme  
mure të larta kishte ngritur  
me gurë të lashtësisë  
në qepallat e vashës  
pamëshirshëm kishin goditur  
këngën e dashurisë  
sot e dje  
pa llogaridhënie  
cilës kohë i takuan ata  
e cilës ne

enigmë e pa zbërthyer  
mbështjellë me vellon e verdhë  
muret e ndarjes  
ngulur kaq thellë  
në zemrat tona  
as i hoqëm  
as i vumë  
as i poqëm  
as i rrënuam

## Syri i keq

syri i keq  
mos të paftë  
lutemi me gjithë shpirt  
mos të marrtë në shënjestër  
e liga  
gurit i raftë  
orë e zezë qoftë larg  
sa borxhe kemi për të larë  
e kujt s' i kemi hak

para njeriut e motit  
hyut i mbetemi kot në qafë  
para motit e para zotit  
shpirtndritura na fali  
zemrën e madhe të dashurisë  
në qafë nuk morën askënd  
engjëllor  
bijtë  
dhe bijat e Shqipërisë

## Mes miqsh

mes miqsh e njerëzish të thjeshtë  
shokë e kundërshtarë  
ëndërrimtarë bjerraditës  
këmbësorë e kalorës me atin e bardhë  
njerëz me këmbët në tokë  
e mend në kokë  
urtësia qoftë me ju  
në kohëra të pakohë  
shtegtarë të vonuar  
me eshkën e ndezur në dorë  
stërgjyshërve të lashtë  
shpirti dritë u pastë  
mes miqve na lanë

## **Dashuri**

njerëzinë dashuronte  
lum e krrua harronte  
pranë burimit  
zemër trazuar ngrihej si n' jermi  
etje kishte  
kishte uri  
për botën e dashurisë njerëzore  
pas muzave prehur  
pas huqeve dehur  
vetën kishte lënë pas dore  
nuk dinte për urrejtje  
dinte  
vetëm për dashuri



## **Askush si ai**

me të gjithë  
për çështjen e madhe shtrohej  
adhuronte mendjendriturit  
të njerëzishmit i donte njësoj  
nuk mbante shkëlqimin për vete  
atdheut shkëlqimin ia dëshironte  
askush si ai  
të vërteten e madhe s'e mbronte

biri i tokës mëmë  
modest  
e  
madhështor

## Një shenjë

lajmi i mirë i një ftese  
që e prisnim kaq gjatë  
rrugë të gjatë do marrim  
drejt malit të lartë

kishim shumë punë  
shenjë e gjallë për ne  
gjëra të pathëna u thanë  
mes asaj që duhej thënë  
dhe asaj që ishte e ndaluar  
gjuha përshkonte  
tehun e shpatës  
në mos  
ta shkurtonin diellin

takimi me të humburit  
na solli në vete  
ringjallje e datës së kallur  
që nganjëherë s'vjen për mirë  
toka nën këmbë po na lëkundej  
koha e shenjave të liga  
që joshin të luhaturit  
mashttrim ky  
që u doli hakut

## **Ky vend**

ky vend  
me vlera kaq të vogla materiale  
këta njerëz  
me vlera kaq të mëdha shpirtërore

e saktë  
i varfër e shpirtmadh  
janë të paktë këta  
janë me fat  
mbi parimet e të njerëzishmes  
veprojnë  
në të mirë të atdheut  
më përkushtim punojnë  
të varfër pambarimisht  
të njerëzishëm  
përfundimisht

## **Pranë sofrës**

me sjellje urtari  
ulur pranë oxhakut  
mes halleve njerëzore  
me ritmin e arsyeshëm  
po rrah zemra e plakut

pranë sofrës së vogël  
ulur jemi  
bukë e kripë kemi  
mirë se erdhe njeri  
se njerëz na duhen  
në këtë kohë  
kaq të panjerëzishme  
eja ulu pranë sofrës  
ka kohë që po presim  
birin e tokës

## **E ndiej**

nder deje diçka më rëndon  
diçka e pa thënë  
sa pesha e gurit  
diçka e rëndë  
e ndiej

ti nuk je guximtar  
aq sa ta pranosh pendimin  
tjetërsimin tonë para hyut  
para shenjtit shpirtëror  
unë e ndiej  
ti nuk e pranon  
borxhin e pakryer  
mes katër rrugëve lënë

kush nuk e ka guximin të pranojë  
si besimtar e burrë  
ikjen nga besimi i parë  
as të krishterë  
as myslimanë  
tamam  
rob i zotit mes rrugëve lënë  
peshë e kryqit prej guri  
lënë anash  
e ndiej  
ashtin që më shpon  
për fjalën e pathënë

## **E gjeta**

respekto gjykimin e tjetrit  
për të tjerët  
mbështetur mbi parimet etike  
ta themi të vërtetën  
për të tjerët  
ma shumë për veten  
nga lustrat të lirohemi  
të themi me sa zë kemi  
e gjeta

nuk ka gjë më mirë  
se kur nuk trembemi  
nga e vërteta

## **Përzierje**

sonte do iki  
në kahun tjetër  
nga andej  
ku shkon njerëzia  
me ndjenjat e përziera  
do marrë rrugë

kisha menduar të largohem që moti  
nga pikënisja ime e parë  
me mesazhin e vonuar të pritjes  
që mbaja nën sqetull të gjallë  
të ndërroj rrugë këtej  
apo në botën tjetër

nuk e di  
nëse janë të lavdëruar para zotit  
ata që i bien ndesh mohit  
në motet e liga  
e motet e mira  
ndërroni rrugë o njerëz  
mos ndrydhni kohën kot  
me ndjenja të përziera

## Çuditërisht

me dashje do thosha diçka  
sikur ta gjejë atë  
që të tjerët nuk e kanë thënë

çuditërisht  
nuk kishte mbetur as edhe një pëllëmbë vend  
rrugën kishin zënë thashethemexhinjtë  
mbi atë që nuk shkruhet  
e që nuk thuhet

çuditërisht më kishte shtënë forca  
e muzës së parë  
që u përmbyll me një zanore  
prapë  
të njëjtit njerëz  
gjëra të njëjta po thonë  
për një botë të tërë keq po flasin

çuditërisht  
vetëm ti  
ke diçka që të tjerëve u mungon  
qartësia e gjuhës me të cilën flet  
guximi për t'u thënë gjërave  
në emrin e vet



## **Bujari njerëzore**

në jetë kanë punuar njerëzisht  
me dashje  
tokën nuk e kanë shkelur rëndë  
me njerëzit  
janë sjellë për zemërsisht  
as thneglat s'i kanë shkelë me këmbë  
askënd nuk e kanë ngacmuar në jetë  
askujt s'ju kanë drejtuar me gisht

me punë të ndershme  
kanë ngritur folenë e ngrohtësisë  
janë përpjekur për vete  
për miqtë  
për atdhe-në  
për tokat e shqiptarisë  
në qafë askujt nuk i kanë rënë  
në rrugët e jetës  
brengat kanë ndrydhur me dhëmbë  
e qarë nuk janë asnjëherë  
në heshtje e pa zhurmë  
kanë hedhur hapin tej  
rrugëve të jetës zvarrë nuk janë heq'  
në këmbët e veta kanë ecë  
me barrët e jetës mbi supë  
askund pa u mbështetë

në konakun e ngrohtë

pranë oxhakut  
bukën e djersës së vet  
pa ndrojtje kanë ngrënë  
në shtratin me kashtë  
gjumin rehat kanë bërë  
në këtë jetë  
borxh kujt nuk i kanë mbetë  
në hak kujt nuk i kanë hy  
të ndershmit bijtë e nënës sonë  
bijtë e rrallë  
të nënës Shqipëri

## **Botë e përtejme**

hamendshëm e rrugë ngatërruar  
sprovë ndjenjash zhgënjimi  
në përballje me padrejtësitë  
që koha i solli në sofrën historisë  
ata nuk u nënshtruan  
kurrë nuk ndaluan hapin  
në kërkim të dashurisë njerëzore  
për ne  
për të njerëzishmen  
bënë të pamundurën  
ata  
si dete  
gjithçka dhanë për të tjerët  
ata  
nuk mbajtën asgjë për vete

## **ZANORET E BARDHA**

## **Kthehu**

kthehu  
të të përqafoj së bashku me lumturinë  
kthehu  
veç edhe një herë  
kthehu

në arkën ku kujtimi ndryrë mbeti  
ku dikur u mbyll ajo derë  
ku pengu i dashurisë nuk u vyshk  
si gjethe e verdhë  
rrahur nga erërat  
degdisur në heshtje  
kthehu

jeta të mori nën sqetull  
pluhurin e kohës davariti  
kthehu tek pragu i këngës së vjetër  
tek ajo strehë  
ku së pari hodhe lirshëm  
këmbën e vockël mbi dhe  
ktheu

## **Abuzim**

në emër të zotit  
në emër të ligjit  
në emër të kodit  
në emër të mëshirimit  
në emër të motit  
në emër të drejtësisë  
çka nuk po veprohet

edhe në shtëpitë e perëndisë  
abuzim  
zoti sehir po bën  
njerëzit kundër njerëzve  
nam të zi po lënë

## **Dritëro Agollit**

*(në tetëdhjetë vjetorin e lindjes)*

poezinë shfletova me kujdes  
atë e gjeta aty  
në botën e madhe me halle  
pranë tryezës  
poetin me zemër të madhe  
Dritëro flokë e zemër bardhë  
fanar  
po kërkonte diellin  
po kërkonte ai  
mallin e muzës së parë

rrugëtim kaq i gjatë  
me trastën e vargjeve mbi shpinë  
pa gjumë e fillikat  
net të tëra zgjuar  
zgjuar si "lugat"  
pa zhurmë  
kaloi pragun e moshës së bardhë  
iku  
dhe erdhi bashkë me lulet e prillit  
Dritëroi që po matej  
me rrezet e diellit

## Shtegtim

kokën kam vënë në prehrin e lashtësisë  
udhëtoj pafundësisht në oazën shqiptare  
ku prek trëndafilin me vesë  
me gishtërinjtë që dridhja i tradhton  
lot e vesë u bënë bashkë  
dhimbja që thellë më shpoi  
thellë  
deri në asht

lojërat e fëmijërisë shqip gumëzhijnë  
në kujtimet e mia  
eh ç'mu këput diçka e krisi  
nga gjoksi im  
diçka si degë lisi  
që bie me dhimbje e rrapëllimë  
e rëndon si guri  
mbi varrin tim ku dheu  
vend nuk zuri

plagë e përjetshme në kraharor  
mbeti  
mbeti mbi gjoks një dorë  
një dorë e ngrohtë kujtimesh  
në rrugët e pafundme shtegtimesh



## **Toka jonë**

e djegur me shkurre  
me varre e lule  
përtej  
shtatë malesh e kodrash  
ku rrapi shekullor  
rrënjët thellë ka lëshuar  
ku gjaku pikon  
mbi kalatë e gurta  
tokë jona e pamatur  
të ligjtë të ndanë  
e ne  
kot  
pse po na mban

## Lajthitje

a thua të ketë mbetur  
diku  
pak ajër të freskët për ta thithur  
sa për të hapur mushkëritë  
një parandjenjë joshëse  
më vuri në lajthitje  
me besimin se diku do të ketë njerëz të mirë

sot  
kjo aventurë e pështirë  
e ndiej  
nga do që shkoj  
e ndiej  
ani pse  
nuk e besoj

## Sprovë

mes sprovash të vështira  
rrugët e jetës të kalisin  
mesazhin e dashurisë përhapni gjithandej  
maje kokës mbani të bardhë plisin  
mos u mahnitni pas fijeve të përjetësisë  
mos e ligështoni fisin  
arbëror

ai  
me dorën e vet burrërore  
mbolli fidanin e parë  
në kopshtin e dashurisë  
në vatrën e prushtë shqiptare  
atdhe  
me besën e dhënë për ty  
për besën u dogjëm  
fjalët mbrapsht s'i hoqëm  
deri në amshim  
ku rrugët e jetës po ndaheshin  
përgjithmonë ikën  
shkuan  
burrat e motit  
fjalën e dhënë për atdhe  
nuk e mohuan  
u kalitën bijtë e tyre  
nga etërit mësuan  
dje edhe sot

atdheut  
me i dalë zot

## **E tha**

ndershmërisht e tha  
m'i gjeni njerëzit e sinqertë  
dua t'i takoj diku  
të shpëtoj prej kësaj brenge  
që na hëngri

e tha  
m'i gjeni ata  
kokën time lë peng  
e tha  
me gjithë mend  
plotësisht e besoj  
ani pse kjo datën kallë  
ku t'i gjejmë ata sot  
janë shumë të rrallë

## **Nuk erdha**

unë nuk erdha tek ty  
me dashje  
pritjen ta bëra copa- copa

ti do mendoje mbase  
ja  
erdhi ky për të kërkuar diçka  
jo  
parimisht  
në jetë  
kurrë nuk kam kërkuar gjë  
unin tim në lojë s'e kam vënë  
as para teje  
as para motit  
as para zotit  
nënshtroar para fatit nuk jam  
nuk erdha  
e nuk do të vij  
me dashje  
pritjen do ta vërë në çmendi

## **E vërteta**

thuaje një fjalë të paktën  
sa për të mbajtur në mend diçka prej teje  
edhe kështu  
lakimeve nuk iu shpëtove dot  
ke parë ti ndonjëherë  
të vërtetën duke shëtitur rrugëve të kryeqytetit  
nëse po  
na thuaj  
nëse e vërteta ishte lakuriq

nëse jo  
ti  
paske ikur nga e vërteta  
praktikisht  
të dy paskeni ikur nga njëri- tjetri

borxhin ndaj botës së moralshme  
nuk e paske larë  
e vërteta me petka veshë  
ti mes të ndershmëve  
lakuriq  
me ndërgjegje zhveshë

## Gjeneratë

kronikat e historisë  
në gjirin e tyre s'na futën dot  
ishte kohë e pa kohë ajo  
mes gjithë atyre përpëlitjesh  
a thua  
na shkoi munda huq  
a thua  
na shkoi munda kot

sa më vjen keq  
në pritje të kohëve tjera  
nuk kishim dëgjuar më parë  
ata që e shpërbënë historinë  
si për habi  
i dolën prapë asaj në ballë

e tmerrshme  
lisi i vjetër rrëzë malit  
më rrënjët në tokën e vet  
historinë që po vonon  
me ndrojtje po e pret



## **Zërin ngrita**

zërin ngrita mbi dhe  
arsyeshëm për t'ju thënë  
nëse nuk më besoni  
eh  
çiltërsia shpirtërore nuk më lejon  
nuk flas  
se brenga ime  
flet vetë

mendoj ndryshe nga ç'mendoni ju  
flas ndryshe nga ç'flisni ju  
veproj ndryshe nga ç'veproni ju  
punë sizifi  
kohë dhe njerëz  
ngritni zërin  
mos heshtni kur gjëma mbi tjetrin bie  
kur ngriheni në mëngjes  
thoni me sa zë keni  
o qafën e theftë  
e kurrë mos paftë ditën e vet  
bukë e besëshkelësi

## **Mendjemadhësia**

eh  
tani duhet të kemi frikë  
nga kujtesa e së kaluarës  
në thyerje e përbuzje  
halle që njohu shqiptari  
atëherë  
harresa mos të na mbulojë  
kur për një pikë ujë  
për një pikë liri  
për një fjalë të mirë  
të vinin në kllapa

me zemër të madhe  
ngadhënjem mbi peshën e robërisë  
varfërinë shpirtërore shporrem  
uroj  
mbi supe të mbajmë  
peshën e ditëve të mira  
uroj  
të mos na lajthitë mendjemadhësia

## Të gjallë

pas kaq vitesh papritur  
ti  
serish shfaqesh në ëndrrat e kopshtit tim  
eh  
të gjallë e të patretur  
dhembjet e fashitura m'i ngacmove  
të humbur e të pa gjetur  
strehëve të këngëve të harrimit  
nën çatinë e shpirtit  
të pata fshehur diku  
koha kishte ngrënë kujtimet  
si ndryshku  
rimat e këngës sonë të kahershme  
që moti nuk janë kënduar  
këngët që koha s'i vyshku

a thua do të ketë nota që artikulojnë melodinë  
në gojën e pranverës së parë  
kur ti ike  
këngën e lë vetëm  
e nuk u bëre më e gjallë  
si kujtim  
lulet mbeten  
me shijen e aromës së parë  
eh  
të gjallë

## **Zotin dëshmitar**

zemër në plasje zana të shitoftë  
kënga t'u zanoftë  
me shpirtin nën dhëmbë kam gërmuar  
shtatë pashë nën dhe  
vargun tënd për ta gjetur  
për të të gjetur  
edhe atje  
ku nuk je

me gjymtyrë të përgjakur  
në rrugëtimin tonë  
drejt diellit e lirisë  
tek pikësynimi ynë i përbashkët  
falë bijve të shqiptarisë  
dorën në zemër  
zotin dëshmitar  
gjatë rrugëtimit kemi hasur  
shqiptarë  
e shqiptarë

## **Kërkojë falje**

kërkojë falje  
bukën time të ngrohtë pranë oxhakut  
dua ta ha rehat  
nën çatinë e shtëpisë sime të lashtë  
shtrirë gjerë e gjatë  
në shtratin prej dërrase  
të mbushur me kashtë  
do pushoj i qetë  
rrethuar me ëndrra të padjallëzuara  
kërkojë falje

as kur jam zgjuar derën nuk ua hap  
makthi i ligësive  
ëndrrat m'i vret  
dua të lirohem vet  
dua të lirohem përfundimisht  
nga njerëzit e ligj

singerisht kërkoj falje  
nga ju o njerëz të mirë  
nga ju o shokë  
nga ju o të dashur miq

# MALLI I PËRFLAKUR

## Trokitjet

pahetueshëm kishte vu dorë vetmia  
tek porta e shtëpisë  
në tentim për të lidhur fijet e këputura  
mes kohës që kishte ikur  
dhe asaj që kishte mbetur  
si në trajektore  
po ndiqnim njëri-tjetrin

tek porta  
lojërat e shkapërderdhura të fëmijërisë  
kujtonin një kohë lumturie  
të largët mbase  
tani ai  
me cigaren mes gishtërinjve të verdhë  
i rebeluar si hije e venitur  
po rrinte në pritje  
tek ajo derë  
ku trokitjet më nuk po dëgjoheshin  
kohën po maste me trokitje  
akrepat e orës së vjetër  
në rinisje  
në pritje  
të një trokitjeje

## **Si trëndafili**

për habi  
edhe këtë ditë  
prapë  
ajo u zgjua kaq herët  
mes nesh ajo vet  
më e bukur se trëndafili  
që jeton  
vetëm një mëngjes

në kopshtin e dashurisë  
ti lulja me vesë  
ku petalet për dhe kishin rënë  
luteni  
mos i shkelni  
mos i shkelni lulet më këmbë



## Enigmë

nuk e vërejmë  
se si kureshtja të bën për vete  
enigmë mbi hyjnitë  
mbi natën e ligë  
dikush po hallakat motin  
dikush  
i mbështjellë me enigmë  
po gërmon kotin

sa më e madhe greminë e enigmës  
aq më e madhe kureshtja  
dhe hallakatja e motit  
realitetin për ta shtrembëruar  
kureshtjen për ta hutuar  
këta ditëhumbur  
këta ditëverdhë  
një jetë të tërë  
me enigmë mbështjellë

## **Të urtës nënë**

lëvizte kujdesshëm me hapat e lehtë  
në oborrin e lulëzuar të shtëpisë  
dorën vënë mbi ballë  
e në soditje  
me aritmi zemre në pritje  
të kthimit të bijve të saj  
përtej avllisë  
po fshinte fshehur lotin e saj  
me cepin e shamisë

eh  
ato pritje të gjata  
në rrugëtim na zu nata  
të dy palët  
pa gjumë  
ne  
dhe nënat që i duam aq shumë  
të urtat nëna  
për ju  
s'do shteret kënga  
kurrë

## Fëmijërisë

retë e bardha të kujtimeve  
po shkapërderdhën ngadalë  
fëmijëri me leckë mbështjellë  
kujtime  
sa një mal  
ndryrë në gjoksin tim thellë

kur kokën mbështetnim në prehrin e moteve  
me dorën e saj nënëlokja  
tufën e flokut na ledhatonte  
me fjalën e saj të ëmbël  
na ndalte çurgun e lotëve  
kur lëndoheshim së vrapuari  
pas joshjeve fëmijërore

ishim fëmijë  
nuk ndaleshim kurrë  
kohë në ikje  
kujtime në fikje  
tek varri yt nën atë rreze  
një lule kishte nxjerr kokën mbi dhe  
fëmijëri e largët se ç'na ndeze  
për nënëloken e pavdekshme  
kujtimin për të

## Në krahët e këngës

erë e myktë e kohës së rëndë  
erë myku e robërisë  
rrethuar me hekur e zjarr  
bijtë e shqiptarisë  
nën klithmën e zhgënjimit  
qiell i kuqrremtë mbi tokën e zhuritur  
pushtuesit ndoqi  
kalorësi ynë mbi kalë  
në krahët e këngës  
me gjoksin e tij valë

në krahët e këngës shaluar fluturimthi  
si era iku  
në bebëzën e syrit loti  
si vesë mëngjesi  
nga gjethja e lisit piku

aspiratë shekullore  
në dridhjen e buzëve të vashave  
lëmsh i mbledhur në kraharorin e nuseve  
peshë e mallit tonë të djegur për liri  
të kthyen në gjirin e këngës  
së bashku me trimin  
të kthyen  
edhe ty

sakrificë  
krenari  
vetëmohim  
kush si dorë e saj e lehtë  
tek foleja ku fëmijët e trimit po rriten  
si era  
atje ku ajo nuk braktisi folenë  
së bashku me ninullat e nënave për fëmijët  
erdhi edhe pranvera

fëmijët e trimit u rriten  
u rriten si era  
shkëlqim e bardhësi plisi  
ishte e madhe ajo  
më e madhe se lisi  
ajo  
folenë e trimit për të gjallë  
nuk e braktisi  
ajo  
më e madhe se lisi

## Këngë

këngë e burrit është vaji  
thoshin pleqtë dikur  
na porositnin ata të mbaheshim  
kur të na zërë e liga  
mbahu  
e bëhu burrë

pa varr e nishan nizam i vjetër  
këngë e djegur  
tek strehë e lashtë e shtëpisë  
kthehu  
kthehu o djalë i Shqipnisë  
se po të presim që treqind vjet  
treqind vjet po të pret  
pajë e vashës  
si zogu në pemë  
këndon a vajton ajo kukuvajkë  
rrem më rrem  
këngë e saj  
këngë e vaj  
toka mëmë po pret  
po pret që sa vjet  
bijtë e saj

## Sykaltër

vështrimin përtej detit kishte hedhur  
eh rrugë e shkretë në mes këputur  
rrugë  
përgjysmë mbetur

atje ku ai pinte ujë burimi  
ajo po e priste trimin  
rrugë  
ngatërruar mes ëndrrash të vrara  
sa s'plasi prej trishtimit  
në prehrin e legjendave  
trimi i saj kishte fjetur  
sykaltër si deti  
si lumi  
në gjirin e këngës përjetësisht  
trimin e saj  
e kishte zënë gjumi

## Çaste

me gjithë shpirt  
do të lutem për ty  
për ata  
e  
për të gjithë ne  
kur të vijë kohë e ndarjes  
të mbajmë mend diçka  
të paktën nga çastet e përplasjes  
mes nesh

mbi gjurmët e lashtësisë  
një kujtim  
mos të lëndohet askush  
atje ku i kishim caktuar  
shtratin gurit  
ku fle i qetë shpirti im  
për pak çaste  
në këmbë qëndrova  
gurët e atdheut për t'i nderuar  
shpirtin tim  
pak  
për ta qetësuar



## **Pritje**

sonte nuk do të flas më shumë  
sonte do të pres në shkujdesje  
pa gjumë  
deri sa të zbardhë

për të të lavdëruar nuk kam  
as nuk të shaj  
në pritje për triumfin tënd  
vendi s'po më mban  
nuk do bëj gjumë  
as net të tjera  
deri sa ti nuk i buzëqesh jetës  
deri sa edhe për ty  
nuk do të dalë pranvera  
në pritje

## **Për ditë**

për ditë e nga pak po zvogëlohen  
hapësirat e kohës së butë  
ashpërsi e mortit  
matemi me hijen  
mbi lëndinën e lotëve  
burrëri e hequr në kandar  
mes kockash shkapërderdhë  
lulet që u thanë nga loti  
një pikë uji  
mbi ployën e verdhë

një ditë  
do rinohen ato  
atë ditë kur tek kjo derë  
do bëhet i zoti  
atë ditë  
do thahet edhe loti

## Malli

bashkudhëtojmë rrugëve të qytetit tonë  
kalldrëme që i kemi shkelur dikur  
së bashku me këmbë  
si në ëndërr i pashë  
i pashë mbrëmë

këngë e vjetër  
që nxjerr vrerin e heshtjes  
mbi melodinë e fatit të djegur  
eh  
si në ëndërr  
ti fluturon mbi re të bardha  
e njerëzishme hijelehtë  
butësi shpirtërore mes yjesh  
si ylli që shndrit

kohë e butë në davaritje  
që mallin nuk e tretë  
ti drenusha e malit  
e bukura e dheut  
që more me vete peshën e mallit  
mallit  
që ende s'u tretë

## **Porta ime e lashtë**

shumë herë jemi ndarë  
e vetëm të kam lënë  
vetëm fillikat  
në rrugët e fatit e të fatkeqësisë  
në rrugën e gjatë  
si thika në zemër  
fat i lidhur me zinxhirë  
me shpirtin nën dhëmbë  
me mendjen tek ty  
e kam pasur rëndë  
e kam pasur vështirë

po kthehem ngadalë  
tani  
nga anët e botës rrugë humbur  
tek porta e atdheut  
i heshtur  
do trokas në dyert e nisjes  
nga ditët e largëta të braktisjes  
po rikthehem  
unë  
biri yt i tretur  
flokëbardhë e i mplakur  
me shtat të përgjakur  
po kthehemi tek pragu yt  
me lëmshin e mbledhur në grykë

## Guri

bota ime profane  
po  
ti ke halle  
me keqardhje  
jam kaq i pafuqishëm  
për t'iu dhënë rrugë atyre  
kush hap e mbyll dyert e mortit  
në përballje me të papriturat  
rrugë morën ata  
ngatërrimi i mbështjellë  
me lakuriqësinë e kohës së vrarë  
ky gur memec  
heshtur e hije vrenjtur  
a do të futesh në dramë  
në histori  
legjendë a mitologji  
ti gur i vendit tim  
ti gur i nënës Shqipëri

## **LIRIKAT E FJETURA**

## Orë e vonë

hyre në portën e shpirtit tim  
e ndrojtur  
në këto orë të vona

ti  
hije e pambrojtur faqe murit  
në pafajësinë tënde degdisur  
kush të goditi kaq padrejtësisht  
këtë damkë kaq të zezë  
kush ia dha  
ëndrrës sate të brishtë

ti  
gërvisht të kaluaren tonë  
mes shpresave të këputura në mes  
me ritmin e orës së vonë  
ku akrepi ndaloi  
me kujtimin e saj tretur  
mbeti ndalë përherë  
akrepi i orës së vjetër

ti  
pranë dritares së vogël  
ku qiriri flakët lëkund në përpëlitje  
kush po i trazon ëndrrat tona  
të kohës së largët  
që gjumin prishin

të kohës në kusuritje  
ne dhe koha  
të dy në pritje



## **Nuk dua**

nuk dua  
që vargu im  
në vete të bartë  
peshën e shqetësimit  
nuk dua të shprushë  
në ëndrrat e bukura të jetës sate  
sylarushë

ylli yt vezullues të ndriçojë përherë  
të rrugëtojë lirshëm hapësirave kaltëroshe  
të shkëlqejë më shumë  
ngase dëshiron  
ti  
më e bukura mes shoqeve  
nga do që shkon  
vetëm ti  
para yllit të mëngjesit  
me flokun e shkapërderdhur mbi gjoks  
agon

## Një ditë

një ditë shtatori të takova  
atë ditë  
ëhë atë ditë

kujtimet fiksuan peizazhin e vonë  
një ditë dhe një herë  
në shtator dashurova  
dhe një ditë tjetër  
shumë më vonë  
u ndeshëm prapë  
nën strehën e vjetër të ëndrrës sonë  
u ndeshëm më kot  
dhembshurisht  
ishte tepër vonë

## **Lozonjare**

vardisur pas këngës si sorkadhe  
të bukurat lozonjare  
në valle  
ngjeshur në radhë  
aritmi  
në gjoksin e saj  
me zemër të kuqe  
ai po bëhej dhëndër  
ajo nuse  
lozonjare gushëkuqe  
vallëzo  
mos ndalo  
rrugë të gjata ka jeta  
jeta  
ka rrugët e veta

## **Lule bardha**

as atëherë  
ti nuk mbaje gërsheta  
me flokun e zi mbi supe  
mes qindra lulesh të gjeta  
me ëndrrat e bukura na lidhi jeta  
dhe ëndrrat i zuri mynxyra  
enigmë e fatit pa zbërthyer mbeti  
ndjesi e butë  
e çiltër ishte rinia  
as atëherë  
ti nuk mbaje gërsheta  
ku do varej dashuria  
bengu i kohës që gërvishtë  
në kujtimet tona  
kohë e vrazhdë  
kohë që nuk ishte  
nuk ishte e jona

## **Dëshirë**

nuk u duk  
madje as sa për të dhënë kumtin  
kokën kishte mbështetur në gjoksin e fatkeqësisë  
për një kohë që ishte fishkur  
për një kohë që nuk shpaguhej  
për një kohë që nuk rikthehej  
me atë pamje të veçantë  
përzgjedhur sipas shijes së saj  
dëshironte të mbetej e vetme  
e vetme  
si pranvera  
në përpjekjet e saja  
ambicie që nuk iu shteruan  
pranverën për ta sfiduar

## **Si hëna**

me dukjen e saj në horizontin e kuqërremtë  
deri dje të kishin sharë  
se na i mashtrove djemtë  
si hënë e kuqe  
moj  
si nuse

e përflakur në qetësinë e natës  
pamje magjike  
këto gjetje të rralla  
si hëna  
na erdhi nusja moj mike  
imagjinatën e krijuesit  
mori me vete  
diku larg e davariti  
diku larg e treti  
kur hëna nga malet zbriti

## **Këngë skofiare**

e buta kënga ime  
me kë do flas unë këtë mesnatë  
në konakun e zemrës sime  
unë dhe ti  
flasim me belhollën  
me syzezën  
me bjeshkën dhe mollën  
me lisat e gjatë  
me kaltërsinë e lumit  
thyejmë heshtjen këtë natë

kënga ime  
këngë e vjetër  
këtë natë  
veç teje  
nuk gjeta prehje tjetër

## **Sorkadhes**

të panumërt janë ata që të kënduan  
kënga për ty kurrë nuk pushoi  
syëmbël  
sybutë  
sinonim i urtësisë  
pritë të vunë të rinjtë  
verbuar nga bukuria jote  
iu plasën mushkëritë

ti  
e ndruajtur si gjithherë  
nuk re në pusi të dashurisë  
sorkadhe  
kush vrau butësinë tënde  
e vraftë dorë e motit  
guri ballërrudhur i shpuar  
i shpuar  
nga kripa e lotit





# TINGULL I GËRVISHTUR

## Shokë

ka shumë kohë që s'ju kam parë  
shtegu i lotit më është tharë  
rrugë të humbura në rrudha të ballit  
fatndëshkuar e djegur mallit  
ngjyra të zbehura faqes barit  
hiri fjetur në vatër zjarrit  
thinja bore mbi kokë tharë  
ka shumë kohë që s'ju kam parë

shokë e miq të vërtetë  
rrugëve të vuajtjes kemi tretë  
rrugë triumfi  
rrugë kujtimesh  
rrugë humbjesh e zhgënjimesh  
rrugë fitoresh  
rrugë gëzimi  
rrugë harrimi pa hak  
mes dëlirësisë e pafytyrësisë  
kafshatë e ligësisë  
ngeli n' lak  
shokë

## **Në heshtje**

njëjtë  
si pararendësit e tij  
iku në heshtje që këtej  
u qërua nga kjo botë  
përbuzësi  
prej kohësh çakorduar  
joshur nga besëtytnitë  
mes hijeve fortifikuar  
buzëqeshje e vrarë  
mbështjellë me petkat e vetmisë  
pjellë e djallit  
nga dritare e kështjellës së verdhë  
iku atje tej  
duke vjellë vrer

## **E hidhur**

larushë të radhës së gjatë  
prapa hënës dhe pas diellit  
të yshtur  
pas yjeve të qiellit  
o bijtë e lakmisë  
çakërritur  
me gishtërinjtë e thatë  
tapitë e humbjes së dekadave  
po mbanin si dhuratë

sa e hidhur  
më kot pritëm ne  
mbetën po ata  
miq të zhgënjimit përgjithnjë  
kohë që nuk riparohet dot  
kohë që na kushtoi  
edhe sot  
kohë e të çakërriturve  
që atdheu po i mban rëndë në qafë  
shija e hidhur mbrapa nesh  
do mbesë  
do mbesë bukur gjatë

## **Ngatërrim**

mbase  
me dashje ngatërruan rolet  
erdhën rishtarët diletantë  
komeditë i bënë paçavure  
rolet ndërruan prijatarët  
për ta lozur rolin e të dështuarit  
në kuvendin e urtësisë  
nuk u dashtë aq mund  
mundin shpagoi spektatori  
mbase me dashje  
ngatërroi urtarin me horrin  
ngatërrim

## **Të dehur**

“heronjtë” e ditëve tona  
esëll nuk i takuam dot  
nga tavernë e kafenesë së qytetit  
surbin e kafesë shijojnë  
raki e mish të skuqur  
lëmë e shtruar  
koqen e qejfit po bëjnë  
nam të zi po lënë

të dehurit e ditëve tona  
për atdhe  
nga “mallëngjimi”  
dehur e përmallë  
kur në tryezën e pistë  
janë shtruar së bashku  
të shitur  
faqezi e tradhtarë  
dehur e bërë përrallë  
ata  
namin e zi po lënë

## **Pa të keqe**

elegant e aristokrat hiqej  
davanë nuk ia kishte  
rolet e huaja imitonte  
sa keq  
nuk po e kuptonte  
fiksionin kishte ngatërruar  
me dëshirën për të bërë rrëmuje  
brenda sojit të vet  
po shitej i huaj

këta sqimatarë e poterexhi  
i bëjnë të qeshin të tjerët  
dhe mua  
të qaj  
me lot në sy



## Shpërfillës

rrudhat në faqet e shoqërisë  
më shqetësojnë  
më vrasin si hijet e marrëzisë  
të kohës së kafshuar  
ku të qeshurat bënin bujë  
të qeshurat me tanët  
të gajasurat me të huaj

deri tek qeshja e fundit  
do të harrohet emri yt  
ata hiqen modestë  
në shpërfillje  
as na qeshin  
as na qajnë  
shpërfillësit  
urrejtjen nën rrogoz  
e mbajnë

## Njerëz

po vuajmë prej hapësirave  
përherë e më të pakta  
uzurpatorë  
kaq shpirtvegjël jeni  
a i kujtoni ndonjëherë  
njerëzit e parë

ata  
që historinë bënë para nesh  
jo këta që sot  
historinë bënë përrallë  
që historinë bënë lesh  
do ikin me një barrë halle  
prej kësaj bote lozonjare  
do ikin prej nesh  
do ikin  
me marre

## Hamendje

duarkryq nuk kishte ndenjur  
element plotësues  
i strategjisë së shpëtimit moral  
për njerëzinë e kombin  
nuk ishte hamendur  
botërisht kishte diskredituar ligjbërësin  
në anën e kundërt të tyre  
ishte gjendur  
me vetëdije  
dje

e sot  
po me aq vetëdije  
ligjbërësin e dikurshëm  
e kishte ngritur në nivel përgjegjësie  
hamendje  
kujt t'i besojmë  
rend dhe ligj- bërësit të cilës lojë

## **Darkë e sajuar**

vuante për të u dukur ndryshe  
hiqej këngëtar  
e nuk njihte as vokalin e tingullit  
me enigmën e tij për të shkëlqyer  
nëse do t'i vinte radha  
për t'u ulur pranë sofrës  
të darkës së sajuar  
me lugën e drurit në dorë  
kishte ngrirë si statujë  
ky peng i kohës sonë  
i darkës së sajuar  
i darkës së vonë

## Stoli

e bukur vezulluese  
ç'e do  
në gjoksin e huaj  
kokën kishte mbështetur  
në dremetje po kërkonte  
një përqafim tjetër

të hallakaturat e vjeshtës  
ëndrrat e kota kishin shpërfytyruar  
si flakën e qiririt në fashitje  
mbi faqen e murit  
gjurmët lënë  
shkëlqim në gjoksin e huaj  
shkëlqim i rremë  
nuk ishte më shumë  
së një mashtrim i kotë  
në ëndrrat tuaja të pafundme  
fatkeqësisht  
mashtrim që po zgjatë  
edhe sot

# **KUMBIM KAMBANASH**

## Stublla

më të nevojshëm se ushqimin  
e ndiej  
të kuvendoj me njerëzit e gjakut tim  
nga largësitë  
ku zëri im prej mallit  
ngulfatet  
një zë mallëngjimi  
një zë prej mërgimi

a ishim ne a fati  
që besimit na ndau  
a fuqi e zezë e motit  
armiqësoi profetët tanë  
edhe shtëpitë e zotit  
i ndau

mallkuar qofshin mohuesit  
amen  
malli dogji peshën e vet  
Stublla e gurtë  
Stublla e murtë  
atje kur Krishti zbriti s' pari  
atje  
ku e priti shqiptari

## **Efekt emocional**

ndoshta  
efekt emocional ky  
shikuar në thellësinë e çështjes  
thellë  
deri në intimitet  
them prapë  
ndoshta

të mos shkasim  
nga këndvështrimi racional  
nuk dukej krejt pa përgjegjësi  
ndaj kastës së të ligjve  
efekt e akt  
që pasqyron ndjenjat  
mos humbni arsyen  
e veprimit  
për efektin emocional



## **Burrë të jesh**

në kurriz të tjerëve  
luajnë rolin e vet hileqarët  
sipas nevojës  
rolet përshtatin prapa kuluareve  
“baballarët e kombit”  
që piketojnë kotësinë  
pa cak e pikësyzim  
ata  
kalërojnë atllarët

në këtë udhëtim tani  
të vetëdijshëm se një jetë e re  
po fillon  
ndodhur përballë të papriturave  
hileqarë  
nuk e kisha marrë vesh  
nuk e kisha marrë me mend  
kaq ulët paskeni ra  
nuk qenka e lehtë burrë të jesh  
fryma në dysh m'u nda  
burrat sot  
ku t'i gjesh

## Botë moderne

kambanat po bien me rrapëllima  
ruana zot  
po t'i kisha unë në dorë  
do ta zgjoja botën e fjetur  
degdisur në shtratin e saj të heshtur  
me rrapëllima  
do zgjuar kjo botë profane  
zhytur në pellgun e errësirës  
së kësaj nate të madhe

ju inferior e shpirt vrarë  
frytin e braktisur kujtoni  
nga afër dritares dëgjoni  
çjerrjet e natës  
tundimin e saj  
nga kumbimi i kambanave  
klithje  
thirrje  
vaje  
për fatin e lig të atyre  
për fatin e lig të saj  
botë e kambanave në klithje  
me dridhma e përpëlitje  
shënon rënie  
apo ngritje

## **Tkurrje**

reliev i atdheut tim  
si hartë e zhubrosur mbledhur shuk  
futur në grushtin e hekurt  
kohë e re  
bartëse e pazarit të kohës së vjetër  
kur hartat na i shthurnin  
dhe gurët  
tek derë e shtëpisë  
na i ngulnin

i ndanin tokat e shqiptarisë  
reliev gunga - gunga  
të tkurri kaq shumë koha  
më shumë  
të tkurri dhuna  
toka që vazhdon të thërrasë  
ku jeni o burra  
se frymën ma zu tkurrja

## **Ngadhënjimtar**

në vorbullën e mendimeve të mia  
humbur e tretur  
papritur ia bëhu ai  
tamam burrë  
mbeta ulur  
këmbët nuk po më bënin  
duart po më dridheshin  
ngadalë po ligështohesha  
a veten po merrja  
ai u kthye ngadhënjimtar  
i madh sa një mal  
erdhi për të ngrënë  
bukën e lirisë  
biri ynë  
biri i shqiptarisë

## **Mos më kërkoni**

fjalët e duhura  
të lodhshmit e kësaj bote  
me qiririn në dorë kërkojnë  
në mesin e kësaj errësire  
mbase për shpagim shpirtëror  
lutjet e motit që shkuan huq  
shpërfillësi si gjithnjë  
as nuk u skuq

në adresën e gabuar  
keni dërguar mesazhin e mëshirimit  
shpërfillësit e djeshëm  
mos i falini  
as këtë mot  
se mëshirimi iu shkon kot

ai më së paku kërkoj nga ne  
të vetmen fjalë që tha  
luteni  
mos më tjetërsoni  
së tjetërsimi më fyen  
të paktën  
atje ku nuk jam  
mos më kërkoni  
mos

## Ecje

me vështrimin e tretur larg  
meditim në ecje  
në rrugën e madhe të kësaj bote  
me hapin tim të vendosur  
shkeli me kujdes  
mbi buzët e çara të tokës së plasaritur  
dhembjet nuk dua t'ia rëndo  
ecje përpara  
në plasaritjet e tokës së etur  
për një pikë uji  
atje thellë  
ku ka zënë fill fara

me gjithë krenarinë e ecjeve  
në rrugët vjeshtake  
nën prizmin e syzeve të mbylltë  
më i moshuar se dje  
më i ri se sot  
një jetë na vëzhguan ata  
ata që vranë kohën kot

vrulli ynë djaloshar  
me zemrën e madhe  
ngjyrën e frikës ka vranë  
sakrificë që nuk shpaguhet kurrë  
ecje që vrau hijet  
me rrezet e diellit të parë

ecje me ballin lartë  
ecje krenare pa ndrojtje  
mbi buzët e tokës së plasaritur  
një copë qiell  
një grusht diell  
një pikë uji  
një copë liri  
ku do rrojmë së bashku  
të gjithë  
edhe  
unë e ti

## **E dukshme**

a ia vlen  
të dëgjosh leksione  
nga ata që leksionet  
nuk i pranojnë  
mbi të vërtetën që nuk e mbrojnë  
e dukshme  
mungesë guximi  
për ta dëgjuar  
për ta thënë  
për ta mbrojtur  
të vërtetën  
ata duna një leksion të mirë  
vërtetë  
sa ia vlen tani kur e gjitha ajo që iku  
nuk rikthehet dot



## **Nga lart**

nga lart më sheh  
si cubat më ke zënë pritë  
besëprerë  
zemra ime e lodhur  
ritmin e dikurshëm nuk e mban më  
dilemës së përzgjedhur  
po i vjen fundi i fundit  
çfarë të të them

vetëm dielli është i pamposhtur  
e hidhur por e vërtetë  
dy fjalë për ne  
dy fjalë për atë  
dy fjalë për botën  
në beteja me lakmitë  
të pakët fituan  
më se paku ata  
që gjërat i shihnin nga lartësitë

## Thuj

gjuhë e heshtur  
pret me durim  
ata që shfryen deri në banalitet  
herezi që na shpuri në lajthitje  
cilat ishin fijet e padukshme të durimit  
nga ku ishte kapur ai  
për të mos rënë në krahët e dëshpërimit  
për të mos rënë  
më poshtë se hija e vet

ndero të ndersimit  
gjërat thirri në emër të vet  
hajnit thuj me emër  
hajn  
gënjeshtarit  
gënjeshtar  
sajuesit imoral  
tradhtarit  
tradhtar  
shpirtërisht ndihu i lehtësuar më pastaj  
ke thënë të vërtetën e natyrshme  
gjërave ju ke thënë  
në emër të vet

## **Moshë dhe vite**

ngarkuar mbi kurrizin tonë  
vitet  
për ditë po rritën  
po shtohen  
në kujtesën tonë mbetën  
bëmat që ikën  
bëmat që kalëruam  
vite që nuk mund të peshohen

sa ishim gjallë e të fortë  
nuk e vlerësuam kohën  
kohën që na iku ndër duar  
o zot sa jemi penduar  
iku e nuk kthehet më  
përballje e plasur në sfondin e verdhë  
tek liria e shumëkërkuar  
lini hapur  
e mos e mbyllni atë derë

kush di të qetësojë shpirtrat e trazuar  
shpërndarë në qindra pjesë  
mbi copat e prera të jetës  
moshë dhe vite  
si në ëndërr  
kohë në ikje

## **Të kërkoj**

duart më ranë copë duke gërmuar  
në mos  
në gjirin e tokës do të gjej ty  
e ti  
mbi dhe qenke  
hyjni  
kush s'të këndoj ty

në udhëkryqet e ngatërruara të jetës  
mos humbni shpresat  
gjërat mos i merrni me rrëmbim  
gjyko arsyeshëm mbi synimet tuaja  
narracion në ikonizim  
hyjni e kultit tragjikomike  
duart me ranë copë  
kërkoj shpërfytyrimin tënd  
me ecje e në vrap  
të kërkoj e nuk të gjej  
me ngulm  
do të kërkoj prapë

## **Më duhesh**

miku im i dashur  
me duhesh  
mbase më shumë së kurrë  
fjalën patëm dhënë  
ta gjejmë veten  
së bashku me të vërtetën që është një  
në orën e vdekjes  
mos të shkelim të ndruajtur  
peshën e gjykimit ta ndjejmë  
si peshën e gurit  
në shtegun e prurjeve të vonuara  
ta mbajmë fjalën e burrit  
do vdesim vertikalisht e në këmbë  
sa ishim gjallë e të fortë  
me gojën tonë patëm thënë  
do vdesim  
po  
do vdesim në këmbë

## Peizazhe

përtej mureve të gurta  
peizazhe të vona  
në perëndim të diellit  
nuanca të papërsëritshme përjetimesh  
fryma jote  
gjithkund e pranishme  
si tufë zogjsh në fluturim

përtej mureve të gurta  
që vrasin kuptimin e jetës  
me gjuhën memece të heshtjes  
frymë e këputur

përtej largpamësisë sonë  
atje ku valon palë e flamurit  
në tentim për të triumfuar  
mbi kohët e vrazhda të gurit  
ku peshë e gurit flet  
me gjuhën e popullit  
“guri rëndë peshon në vend të vet!”

## Mes

mes dy botëve në mëdyshje  
atje ku njëra mbaron misionin e saj  
fillon tjetra  
vazhdimësi sfiduese  
si hallka zinxhirësh  
futur në kthetrat e kohës së re  
nëse do kemi mundësi  
edhe atje  
të shkruajmë kështu  
nga një këngë të bukur  
nga një poezi  
që pavdekësinë pret  
muza që na joshi  
me fuqinë e vet

## **Të gjithë**

në këtë jetë  
të gjithë jemi sprovuar nga pak  
djegur jemi  
gëzuar  
fyer e prekur  
zhgënjyer e ngazëllyer  
si valët e lumit në përplasje  
me buzë në vaji  
e zemër në plasje

në kacafytje me brengat e saj  
për të ecur vertikalisht  
jemi përpjekur  
të mos na tregojnë me gisht  
të tjerët  
me sprovat e saj jemi ndeshur  
pa plagët e shpirtit  
kush ka shpëtuar  
krenarë qëndroni për ballë saj  
jeta është e mirë  
jetoni atë  
jetën  
askush nuk ta falë

***Zvicër, 2012***



## Shënime për autorin

Mehmet Bislimi lindi më 24 mars 1958 në fshatin Prekaz i Epërm të Skenderajt. Shkollën fillore e mbaroi në vendlindje, kurse gjimnazin në Skenderaj. Në Universitetin e Prishtinës studioi shkencat natyrore. Në vitin 1981, për shkak të veprimtarisë atdhetare, arrestohet dhe dënohet me burg. Pas daljes nga burgu, më 1986, veprimtarinë kombëtare e vazhdoi në gjirin e LPK-së, ku pati detyra me përgjegjësi. Në vitin 1994, i përndjekur nga regjimi serb u strehua në Zvicër, ku vepron dhe jeton me familjen e tij. Gjatë luftës së Ushtrisë Çlirimtare të Kosovës ka bartur detyra me përgjegjësi.

Me krijimtari letrare ka filluar të merret që herët. Shkrimet e para i ka botuar në gazetën "Bota e re", Prishtinë, 1986. Më vonë në revistën "Alternativa", në Lubjanë, si dhe në disa numra të gazetës "Rilindja", që botohej atë kohë në Zvicër.

Disa vjet ka shkruar për organin e LPK-së "Zëri i Kosovës" që botohej në Zvicër dhe për të përkohshmen "Rruga jonë"- që dilte në Francë. Në të dy gazetatat, për një kohë të gjatë, është paraqitur edhe me këndin e humorit me nofkat "Ngucakeqi" dhe "Gjemb". Kohë pas kohe shkrimet e tij kanë gjetur vend edhe në gazetën "Epoka e re", "Lajm", "Kosova sot", "Shekulli"

etj., si dhe shkrime të shumta në dhjetëra faqe elektronike. Veprimtaria e tij letrare përfshin shkrime publicistike, anekdota, humor, poezi, prozë, si dhe mendime të urta popullore. Deri më tani ka botuar këta libra:

1. *"Anekdota popullore dhe satira autoriale I", Prishtinë 2002*
2. *"Trëndafila maji" – poezi, Prishtinë 2002*
3. *"Fjalë dhe gurë" – poezi, Prishtinë 2003*
4. *"Këtu i thonë Drenicë - Tahir Meha – monografi", Prishtinë 2004*
5. *"Ironi e verdhë" - poezi, Prishtinë 2005*
6. *"Stinë e vonuar" - poezi, Prishtinë 2008*
7. *"Shkrime publicistike", Prishtinë 2009*
8. *"Anekdota popullore dhe satira autoriale II" - Prishtinë 2010*
9. *"Mehmet Delia - alias Mehmeti i Vogël"- monografi, Prishtinë 2011*
10. *"Shpirtndrituri"- poezi, Prishtinë 2012, është libri i tij i radhës.*

## **Përmbajtja**

### **FJALA E REDAKTORIT..... 7**

DREJT SHTEGTIMEVE TË REJA E MË TË THELLA POETIKE.....	7
--	---

### **MADHESHTI E YJEVE..... 17**

LEGJENDARIT .....	18
REMZI ADEMIT .....	20
LUANIT .....	21
VATËR KRENARE .....	22
GËNJEVA .....	23
GJITHMONË.....	24
PIKA LOTI .....	25
ÇAMËRI .....	26
NËNTORI.....	27
NDËR SHEKUJ .....	28
ME GJUHËN E VET.....	29
SI NË ËNDËRR .....	30
SA MALI .....	32
E TILLË ISHTE JETA .....	33
HYRJE NË PRANVERË .....	35
VLORA.....	36
RREZE DIELLI .....	37
KËNGA IME .....	38
NUMRA.....	39

### **URTARË MJEKËRBARDHË..... 41**

MESAZH.....	42
AI.....	43
MURE .....	44
SYRI I KEQ.....	45
MES MIQSH .....	46

DASHURI.....	47
ASKUSH SI AI.....	48
NJË SHENJË .....	49
KY VEND.....	50
PRANË SOFRËS .....	51
E NDIEJ .....	52
E GJETA .....	53
PËRZIERJE .....	54
ÇUDITËRISHT .....	55
BUJARI NJERËZORE.....	56
BOTË E PËRTEJME .....	58
<b>ZANORET E BARDHA.....</b>	<b>59</b>
KTHEHU .....	60
ABUZIM .....	61
DRITËRO AGOLLIT.....	62
SHTEGTIM .....	63
TOKA JONË.....	64
LAJTHITJE .....	65
SPROVË.....	66
E THA .....	68
NUK ERDHA .....	69
E VËRTETA.....	70
GJENERATË .....	71
ZËRIN NGRITA .....	72
MENDJEMADHËSIA .....	73
TË GJALLË.....	74
ZOTIN DËSHMITAR.....	75
KËRKOJË FALJE .....	76
<b>MALLI I PËRFLAKUR .....</b>	<b>77</b>
TROKITJET .....	78
SI TRËNDAFILI .....	79
ËNIGMË .....	80
TË URTËS NËNË .....	81
FËMIJËRISË .....	82

NË KRAHËT E KËNGËS .....	83
KËNGË .....	85
SYKALTËR .....	86
ÇASTE.....	87
PRITJE.....	88
PËR DITË .....	89
MALLI .....	90
PORTA IME E LASHTË .....	91
GURI.....	92
<b>LIRIKAT E FJETURA.....</b>	<b>93</b>
ORË E VONË .....	94
NUK DUA .....	96
NJË DITË .....	97
LOZONJARE.....	98
LULE BARDHA .....	99
DËSHIRË .....	100
SI HËNA .....	101
KËNGË SKOFIARE .....	102
SORKADHES .....	103
<b>TINGULL I GËRVISHTUR.....</b>	<b>105</b>
SHOKË .....	106
NË HESHTJE.....	107
E HIDHUR .....	108
NGATËRRIM .....	109
TË DEHUR .....	110
PA TË KEQE .....	111
SHPËRFILLËS .....	112
NJERËZ .....	113
HAMENDJE.....	114
DARKË E SAJUAR .....	115
STOLI.....	116
<b>KUMBIM KAMBANASH .....</b>	<b>117</b>
STUBLLA.....	118

EFEKT EMOCIONAL .....	119
BURRË TË JESH .....	120
BOTË MODERNE .....	121
TKURRJE .....	122
NGADHËNJIMTAR .....	123
MOS MË KËRKONI.....	124
ECJE .....	125
E DUKSHME.....	127
NGA LART .....	128
THUAJ.....	129
MOSHË DHE VITE.....	130
TË KËRKOJ .....	131
MË DUHESH .....	132
PEIZAZHE.....	133
MES .....	134
TË GJITHË .....	135
<b>SHËNIME PËR AUTORIN.....</b>	<b>136</b>
<b>PËRMBAJTJA.....</b>	<b>138</b>

ISBN

Tirazhi  
200 copë

Formati  
120 X 190

Shtypur në shtypshkronjën  
Shkrola  
Prishtinë  
2012